

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tũpa reroyasa pipe ereico. Che niha Jesucristo apóstol aico, yande Pĩsĩrosar Tũpa porocuita rupi iyavei yande Yar Jesucristo porocuita rupi. Ahe niha yande remi-aro. Tombou yande Ru Tũpa, yande Yar Jesucristo oporovasasa, oporoparaisuerecosa ndeu nde reco tupri ãgua.

Pablo, “Eicua catu porombohesa co coti tẽi vahe sui” ehi Timoteo upe

³ Iyavei acoi aipo ahe ndeu cuese che so ãgua Macedonia ve: nde epita co tecua Efeso ve. Evocoyase eremboaracuara co ava co coti tẽi oporomboaracua vahe, toporomboaracua eme pihañemoñetasa co coti-coti tẽi vahe rese yuvireco.

⁴ Toyapisaca eme avei tecocuer ipapapri tẽi vahe rese, tecocuer aracahendar ãgũe ehi tẽi vahe rese avei. Ahe ichui osẽ yeacasa naporai vahe yepi; ndayande pĩtivii rumo Tũpa remimbotar reroya tupri ãgua rese.

⁵ Sese co amondo porocuita ndeu yande yeaisu ãgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe.

⁶ Esepia, amove ava oime ichui oyearacua mo-cañi oñehe-ñehe tēisa pīpe yuvireco.

⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté.

⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua ãgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar pīhañemoñetasa; acoi vu, osi oyuca vahe; opacatu ava oporapichi vahe upendar.

¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara.

¹¹ Co porombohesa nimarai vahe oyoya tupri ñehesa porañete vahe poropīsirosa resendar rese. Tūpa sovasapri seci, ahe che cuai vahe sese.

Pablo oparaisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe ãgua. Es-

epia, ahe oyeroya che rese. Sese che mondo oñehengagüer mombehu ãgua.

¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapa vahe.

¹⁴ Ëgüe ehi yande Yar ombou catu oporovasasa che rese iyavei ombou che oyese yeroya ãgua iyavei che poroaisu ãgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe pīsiro ãgua. Che rumo acoi ivate catu vahe yipindar aico ipãhuve.

¹⁶ Sese Tūpa che paraisuereco che rese rane Jesucristo reco mbegüe tuprisa mboyecua ãgua. Ëgüe ehi che recocuer upe ambuae ava seroya ãgua. Ipipe sui osupitira tecovesa apirēhi vahe yuvireco.

¹⁷ ¡Sese yamondo imboeteisa apirēhi yande Rerercuar ndopai vahe upe! ¡Ahe nomanoi vahe, ndayasepiai vahe, ahe ñepei vahe Tūpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua ãgua mbahe tēi recopi ãgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa

²⁰ inungar vahe Himeneo rese, Alejandro yuvirecoi. Ahe che amondo Carugar povrive

‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure ãgua, peporandu, pemondo avei “aviye” pe hesa Tūpa upe opacatu ava recocuer rese.

² Iyavei peyerure opacatú mborerecuar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei.

³ Co aviye ité; ahe niha yande Pĩsirosar Tūpa remimbotar.

⁴ Supi eté ahe oipota opacatu ava ñepihiro iyavei co porombohesa supi eté vahe cua tupri ãgua.

⁵ Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo.

⁶ Esepia, Jesucristo omano opacatu ava yangaipa vahe repirã ipihiro ãgua. Ahe imombehusa chupendar ari iporavopri rupi.

⁷ Sese che supi eté apóstol, icuairi aico Tūpa Ñhengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei.

⁹ Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí

vahe inungar oro oyese yuvireco. Iyavei turucuar sepi rusu vahe tomonde eme yuvireco.

¹⁰ Iyacatu rumo yuvirecoi tuprira güemiapo aviye vahe pipe, inungar cuña oyemondo tupri vahe Tūpa upe yuvireco yepi.

¹¹ Iyavei cuña tosendu porombohesa oquiririsa pipe imboyeroyasave.

¹² Ndaipotai cuña oporombohe ava rehi pāhuve iyavei toyocuai eme cuimbahe. Iyacatu rumo iquiririñora yuvireco.

¹³ Esepia, Tūpa oyapo yipindar Adán; ipare Eva oyapo.

¹⁴ Adán ndahei imbopapri; cuña rumo oyembopa uca. Ichui oviapi angaipa pipe.

¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tūpa reroyasar rārosar cuaita

¹ Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui aviye catu vahe.

² Sese acoi vireco vahe ocuaita Tūpa reroyasar rāro āgua, ahe seci tuprira mbahe aviye vahe pipe yepi. Ipipe ava noñehei chira yamotarēhisave. Iyavei omendara ñepei cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güētave. Oicua aveira ava mbohe tupri āgua.

³ Iyavei ndahei chira caguar tēi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi.

⁴ Iyavei oicua tuprira güëta pipendar rãro ãgua. Ombohe aveira guahir iporeroya ãgua, iporomboetei ãgua avei.

⁵ Esepia, acoi ndoicuai vahe güëta pipendar rãro, ¿mara ehira evocoyase Tũpa reroyasar rãro?

⁶ Tũpa reroyasar rãros rumo ndahei chira oipisi ramo vahe Tũpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Caruguar nungar.

⁷ Iyavei oyecua uca tupri ranera Tũpa reroyasarēhi pãhuve. Ahese ndipoi chira imboeteiēhisa iyavei ndoviapi chira Caruguar povrive.

Tũpa reroyasar rese ihañeco vahe cuaita

⁸ Iyavei Tũpa reroyasar rese ihañeco vahe yuvirecoira oporomboeteisa pipe. Tomboaviye ofehe. Ndahei chira caguar tēi; ndahei chiaveira guarepochi pota raisar tēi.

⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco.

¹⁰ Iyavei secoãhasa ranera. Acoi osē tuprise, ahese toyuvirecoi Tũpa reroyasar rese ihañeco vaherã.

¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco.

¹² Iyavei Tũpa reroyasar rese hañecosar ñepeño itera sembireco, oicua aveira guahir rãro tupri ãgua, güëta pipendar rãro ãgua avei.

¹³ Esepia, Tũpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeẽhisave avei secoira Jesucristo reroyasa pipe.

Tũpa reco oyecua ramo vahe reroya tuprisa

¹⁴ Che aso pihaiivi pota nde repia. Aicuachía rumo co che ñehe ndeu

¹⁵ acoi che aracahese, ereicuañora rumo pe reco tupri ãgua ava Tũpa rese yuvirecoi vahe pãhuve; ahe acoi Tũpa oicove vahe upendar yuvirecoi, oye-moviracua tupri vahe yuvireco co porombohesa supi eté vahe mboyecua ãgua.

¹⁶ Supi eté tuvichá etepri Tũpa reco oyecua ramo vahe reroya tuprisa:

Cristo oyemoporẽhi yande reco nungar pipe yandeu.

Ipare Espíritu pipe imboyecuasa secocuer supi tupri vahe.

Iyavei Tũpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

4

Oimera ava oyepepi vahe Tũpa rese oyeroyasa sui yuvireco coiye

¹ Iyavei Espíritu aipo ehi tupri yandeu: coiye, ari cañi renonde, amove ava oyepepira Tũpa rese oyeroyasa sui yuvireco. Omboyeroyara espíritu

oporombopa tēi vahe, porombohesa Carugar suindar avei.

² Oyapısacara ava aipo ehi tēi vahe rese, semi-rañete ai vahe ñehe rese avei yuvireco. Ëgüe ehira opıhañemoñetasa mocañi tēi yuvireco.

³ Co ava niha, “Anı chira yamenda” ehi tēi ava upe yuvireco; “Anı chira yahu opacatu mbahe” ehi avei chupe. Tūpa rembiapo rumo co tembıhu poromovıracuasa. Sese Jesús reroyasar iyavei oicua tuprı vahe mbahe supı eté vahe yuvırohura ‘aviye ndeu’ ohesa pıpe Tūpa upe yuvireco.

⁴ Esepia, opacatu mbahe Tūpa rembiapo, aviye ité. Ahe ndiyai chira yaroıro yaıpıse, “Aviye ndeu” yande hesa pıpe chupe.

⁵ Esepia, Tūpa oñehe pıpe yande yeroquise co tembıhu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivıreta iyavei ereyemovıracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapısacai chira rumo acoi mbahe arachendar co ivı pendar yapısaca tēisa rese. Eyembohe catu yande Yar uveño ité nde reco āgua.

⁸ Esepia, yepe aviyeño chíhi yande retecuer yamovıracua viña, yande Yar upe yande reco āgua aviye catu opacatu yande reco uve nara. Esepia, ahe yande pıtivıira yande recove āgua cūrıtei iyavei curi yande recove āgua.

⁹ Co supı eté vahe, evocoyase yande yaroyara opacatu yepı.

¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pĩsirosar, iyavei viroyasar Pĩsirosar catu ité seci.

¹¹ Co porombohesa eremombehura ava pãhuve, erembohe aveira sese.

¹² Tipo eme ava nde reroĩro vahe chĩhivahe catu nde reco rese. Nde rumo ereico tuprĩra Tūpa reroyasar rovaque. Eñehe Tūpa reroyasave nde reco tuprĩsa pĩpe. Esaisu tuprĩ nde yeroyasave nde recocuer maranehi pĩpe.

¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerẽhi catu yande rivireta iyavei erembohe tuprĩra.

¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rãrosar upe Tūpa omombehuse nde cuaitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco.

¹⁶ Iyavei eñearo tuprĩ, eicua catu nde porombohesa rese; eyemoviracua sese ité nde hañeco. Acoi eẽgüe erese, ipĩsiropri ereicora; nde ñehe rese oyapĩsaca vahe avei ipĩsiropri yuvirecoira.

5

Mara ehira Jesús reroyasar oyepãhuve yuvireco

¹ Eremboaracua pĩrata eme mbĩa cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbĩa chĩhivahe upe

ereñehe tuprira secocuerã rese inungar nde rivri upe.

² Cuña otĩaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererectora opacatu nde reco catuprĩa pipe.

³ Acoi imer mano vahecuer ité ereipĩtivĩra que mbahe ipane vahe rese.

⁴ Que oimese imembri, anise que semiariro, toyembohe rane ocuaita mboaviye ãgua yuvireco chupe. Ëgüe tehi guaisu mboyevi chupe, ahe niha Tũpa remimbotar.

⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tũpa rese, iyavei oyeroquiño ité ari, pĩtu yacatu yepi.

⁶ Osecase rumo mbahe güemimbotar yuvireco, ahese omano vahe tẽi secocuer yuvirecoi.

⁷ Eyocuai tupri ava co ñehesa rese; ichui ndahei chira ava ñehepora tẽi yuvirecoi.

⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tũpa rese oyeroyasa rupi iyavei mbahe tẽi catu Jesús reroyasarẽhi sui.

⁹ Icuachiasara rumo ambuae cuña imer mano vahecuer pãhuve ivate catu sesenta sui iharaviter vahe, iyavei ñepeĩño ité omer vireco vahecuer.

¹⁰ Icuaprira secocuer icatuprĩa rese, omboacua tuprise chĩhivahe oyesuindar, omoinguese ava güeta pipe, ihañecose ava Tũpa reroyasar rese ipi sei ãgua, oipĩtivĩise ava iparaisu vahe, oyapo tuprise opacatu mbahe avĩye vahe.

¹¹ Ereicuachía eme iharaviter ndosupitĩ vahe

sesenta cuachiar p̄ipe. Esepia, amove güemimbotar p̄ipe t̄ei oyepepi Cristo sui, omenda yupagüe pota iri vahe.

¹² Ip̄ipe oimera T̄üpa poronupasa chupe. Esepia, yip̄indar oyemondo T̄üpa upeño ité oyecuachiase. Ipare rumo nomboaviyei eté oñehe.

¹³ Iyavei oi yacatu rupi t̄ei oguatase oico, ahese v̄irecora oat̄ehisa, iyavei imahechiroi t̄eira, oñangareco t̄eira opacatu rese, omombehu-mbehu t̄ei aveira mbahe naporai vahe.

¹⁴ Sese co aipota acoi imer mano vahecuer cuñatai v̄ite vahe: tomenda iri, timembi iri avei yuv̄ireco, iyavei tosãro tupri güëta p̄ipendar. Sese yamotar̄ehimbar secocuer ndahei chira oñehepora t̄ei v̄ireco yuv̄ireco.

¹⁵ Esepia, oime ité amove oyepepi vahe güemimbotar p̄ipe Caruguar rupi güeco ãgua.

¹⁶ Acoi oimese que cuña T̄üpa reroyasar v̄ireco vahe que cuña imer mano vahecuer oyep̄iri, ahe toip̄itiv̄ii yuv̄ireco. Ahe sese evocoyase t̄üparo pendar nihañeco chira. Ahese oicatura supi eté imu ndipoi vahe rese hañeco ãgua yuv̄ireco.

¹⁷ Iyavei acoi T̄üpa reroyasar rãrosar osãro tupri vahe, ahe toip̄isi catu ava porop̄itiv̄iisa imboyeroyasave. Acoi oyemondo vahe T̄üpa Ñhengagüer mombehu ãgua, ava mbohe ãgua avei, ahe co porop̄itiv̄iisa oip̄isi catura.

¹⁸ Esepia, aracahendar icuachiapri p̄ipe aipo ehi: “Ereyuru ãp̄ichi rene tiv̄i oporav̄iqui vahe trigo cambesar” ehi. Iyavei aipo ehi: “Mbia oporav̄iqui vahe iyacatu oip̄isira oporav̄iqui repr̄i” ehi.

19 Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

20 Acoi oimese rumo angaipa aposar ipāhuve, ahese eremboaracuara opacatu ava rovaque. Evo-coiyase ambuae osiquiyera angaipa apoēhi āgua yuvireco.

21 Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuita, nderemomahuatīi chira ava imboaracua nde remimbotar rupi tēi.

22 Ndahei chira pīhaivi eresenoī mbīa mborocuita rese ihañeco vaherā. Aviyeteramo nde rese pāve mbahe oimera. Eñearo tupri nde reco maranehisā pīpe.

23 Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

24 Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa.

25 Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

1 Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no.

² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetasa sepirusu vahe nungar

Eporombohe, emombehu co mbahe:

³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tupri sa rese,

⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa

⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihñemoñeta Tūpa rese omahenduhasa pipe mbahe rereco ati āgua yuvireco viña.

⁶ Yayembovihanose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu.

⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi.

⁸ Iyacatu rumo yarecose yande remihura, yande yemonde ãgua avei, sese yayembovîhañora yaico.

⁹ Amove rumo ava, “Mbahe rerecosar ité taico” ehi tiête viña, ndoyemovîracuai rumo tecoãhasa upe. Ipare oviapi mbahe tēi pîpe, setá mbahe pota raisave, ipîpe oyeecomomara. Ipare oyemocañi tēi.

¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pîpe oyepepî Tūpa reroyasa sui iyavei omombaraisu güecocuer ipîpe ahe ae yuvîreco.

Tūpa rese yande reco vîracuasa

¹¹ Nde rumo, Tūpa rese ereico vahe, eyepepî opacatu co nungar mbahe naporai vahe sui. Eico nde reco ñvisa pîpe, ndemahenduhaño ité Tūpa rese. Eroya, esaisu, eñmosa avei eico nde reco mbegüesave.

¹² Eyemovîracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco ãgua ava eta rovai.

¹³ Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tuprî ité supî eté vahe Poncio Pilato rovai, che orocuai

¹⁴ ndererovai chira che remimombehu ‘tipo eme, mara ehi, ehi tēi vahe yuvîreco ndeu’ che yapave. Nderepoi chietera co nde reco tuprîsa sui acoi ouse yande Yar Jesucristo.

¹⁵ Acoi oyepotase arî imombehuprî curi, ahese Tūpa omboyvîra Guahir. Ahe niha ñepe vaheño

ité imboeteipri, seco pĩrata catu vahe. Aheño ité niha mborecuar ivate catu vahe rerecuar.

¹⁶ Aheño ité teco apirēhi vahe, tesapesa secoci; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opĩratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe Ēgüe ehi tēi vahe. Iyacatu rumo Tũpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporugũ.

¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho āgua ambuae ava upe yuvireco.

¹⁹ Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarã ipa vahe

²⁰ Timoteo, esãro tupri co porombohesa supi tupri vahe Tũpa ombou vahe ndeu. Ereyapisacai rene ava tēi pihañemoñetasa Ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.

²¹ Ipipe sui niha amove ava oyavi Tũpa reroyasa yuvireco.

Aviye, yande Aposar tande rovasa. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739